

halbenn vor uwer gnadenn, so uwer gnade erkennen wirdet wir des pflichtig sein werdenn, zu den selben seinen schulden antwortenn, vnnnd was uwer gnade in dem erkennen wirdet, wollen wir vnns nach uwer gnaden erkenntnis allewege gehorsamlichen haldenn, also doch das der selbige pfarrer vns auch vor uwer gnaden widerumb des rechten sey, alß wir des ein vnzweyfelich vorhoffen tragenn, uwer gnade yn des wol weyßenn wirdet. Daz wollen wir vmbe uwer furstliche gnade mit vnsern vnderthenigenn gehorsamenn dinsten allezeit willig seynn zuuordienen vnd bitten des uwer gnaden gnedige antwort. Geben vnder vnßerm secret am sontage nach Jacobi anno domini ꝛ. LXXXIII°.

Der rath zu Liptzk.

Dem durchlaughtenn hochgebornen fursten vnd herrn hern Ernstenn ꝛ. kurfursten herzogenn zu Sachsessn landtgrauen in Doringen vnd marggrauen zu Mießenn vnnserrn gnedigenn liebenn herrnn.

Nach dem Orig. im K. Haupt-Staatsarchiv zu Dresden.

No. 526. 1484. 4. März.

*Kramerordnung.*

Wir burgermeister vnnnd geschworne ratmanne der stadt Leyptzk bekennen vnnnd thun kunt mit diesem briue vor allermeniglich, die in sehen oder horen lesen, das wir den ersamen gewerken der cramerinnunge alhir bey vnns alle vnnnd itzliche stucke gesetz vnnnd artickel hernach geschriben, die wir in zugelassen vnnnd sie selbst vnnnder sich in irer innunge zuhalten gewilkort, von irer vleissigen bete vnnnd vmb gemeynes nutzes willen, so dorauß komen sal vnnnd magk, in allen vnnnd der innunge zugute confirmiret vnnnd bestetiget haben, confirmirn vnnnd bestetigenn in [die in] vnnnd mit krafft dis brieffs, das die hinfur von allen vestiglich sollen gehalten werden in massen hernachfolget vnnnd stuckweys eigentlich hirinne beschriben steht.

Zum ersten das diese hernachgeschriben stucke vnnnd pfennigwert zuuorhandeln in yre innunge gehorn sollen vnnnd in zugelassen sint, also nemlich alle spetzerrey vnnnd wurtz wie die namen haben magk, dartzu Venedische seife, allerley Kolnische pfennigwert vnnnd birreit, seydentuch, zendal, taffent ꝛ. geworcht seiden ding, getzwirnte borten, offen seyden, getopelte Kolnische beutel mit seyden schnuren, auch getopelt semische beutel geferbet vnnnd vnngferbet, auch semische senckel, vßlendische Schwebische geferbte leywannt, wie dieselbe geferbet ist, auch bogkeschin, wamsin vnnnd weyße Swebische leywannt, bawmwollen, halb bawmwollen vnnnd beuteltuch geferbet vnnnd vnngferbet, parchant, wachs entzln außzuwegen. Vnnnd sulche obengeschriben pfennigwert in ire innung gehorende sal nyemands entzln außwegen nach bey der eln vorkeuffen wider in gewelben kamern nach an offen laden, er sey dann burger vnnnd habe mit in die innunge gewonnen, außgeschlossen die hantwerger vnnnd burger, die sulche pfennigwert als semisch vnd beutel, auch senckel